

Uss èsi temp d'augmentar las pajas

Pretensiuns da l'Uniun sindacala svizra

DA LUCAS DEPLAZES / ANR

■ **En vista al svilup economic da quest onn pretenda l'Uniun sindacala svizra in augment general da las pajas fin 1,5%. Per pudair pajar las premias per las cassas da malsauns proponan lur exponents in supplement spezial.** Ins

haja fixà in bun datum per preschentar las novas pretensiuns da paja per l'onn proxim, ha constatà *Paul Rechsteiner*, a la conferenza da medias dad ier a Berna. Il president da l'Uniun sindacala svizra ha fatg allusiun a l'actual artitgel sin la front da la «NZZ» cun il suttitel «Die Schweizer Wirtschaft wächst kräftig» ed accentuà ch'il temp saja uss vegni per instradar in augment general da las pajas. Il svilup economic da la Svizra è positiv e quai uschebain per l'economia interna sco per impurtantas spartas da l'industria da l'export. Ins possia quintar cun in augment da la produenziun economica da var in pertschient tras tut las branschas. Quest resultat saja er pussaivel grazia a la contribuziun dals lavurers. Rechsteiner ha criticat la politica da pajas dals ultims 20 onns che saja stada caracterisada d'augment da salaris individual. Quest agrir



Cusseglier naziunal Paul Rechsteiner (ps SG) a l'ocasiun da l'orientaziun da medias ier a Berna.

MAD

Pretensiuns da paja per l'onn 2017

Construcziun/renovaziun
+ 80 fr./mais e supplement per cassa da malsauns
Industria farmaceutica
+ 100 fr./mais generalmain; salaris pli auts 120–150
Industria alimentara
+ 80 fr./mais, 100 fr. per salaris fin 5700 fr.
Industria da maschinas
+ 70 fr./mais per tuts, per salaris pli auts 100–120 fr.
Commerzi en detagl
+ 1% generalmain, almain 45 francs per las cassas da malsauns

Posta e Swisscom + 1%

haja gi consequenzas negativas per la gronda part dals lavurers. Ils salaris auts ed ils pli auts han profità surproporzionalmain.

En vista a l'augment da tscherts pretschs (carburant) vegnia la chareschia a s'augmentar levamain (+0,5%). Fitg problematic saja dentant il svilup da las premias per las cassas da malsauns da var 5% per l'onn 2017. Sin fundament da l'actual svilup economic saja in augment general da las pajas fin 1,5% necessari e giustifitgà, ha punctuà Rechsteiner.

Analisa da l'economia

Daniel Lampart, il schefeconom da l'Uniun sindacala svizra, giuditgescha il svilup economic da la Svizra positiv. Durant il segund quartal ha augmentà l'economia svizra per 0,6% en cumparaziun cun il quartal avant. Quest svilup fa surstar sch'ins prenda en consideraziun il ferm franc svizzer. En diversas spartas da l'eco-

nomia, sco l'industria da l'export, il sector bancar, las assicuranzas, l'industria farmaceutica e l'industria da maschinas annunzian ina buna situaziun per il proxim temp. La situaziun finanziala da la confederaziun e dals chantuns sa sviluppa meglier che previs. Cumbain ch'ils budgets quintan cun in deficit sa resultia savens in plus, ha constatà Lampart. La chareschia, che saja anc lev negativa (–0,1%) possia dentant daventar in tema l'onn proxim.

In supplement per las cassas da malsauns

Vania Alleva, la presidenta dal sindicat Unia, ha fatg attent a l'augment constant da las premias per las cassas da malsauns da 4–5% l'onn. Unia pretenda perquai in supplement da 45 francs il mais per pudair pajar las premias. Tals supplements existian gia en diversas branschas, sco en l'industria dad uras e microtecnica, Nestlé Basilea e Phillip Morris.

Nauschas notas per confederaziun e chantuns

La presidenta dal Sindicat svizzer dals servetschs publics, *Katharina Perlicz-Huber*, ha prendi en il visier la politica da pajas dals chantuns e da la confederaziun che hajan persequità durant ils ultims 20 onns in sistem da rundas nulla. Cun in tal agir restan ils impiegads sin il medem nivel da paja ed ils chantuns na pon betg concurrer sin il martgà da lavur. Er la confederaziun haja previs per l'onn proxim e per il futur ina runda nulla e veglia spargnar 20 milliuns francs e quai en in mument che la confederaziun annunzia in surpli d'entradas dad 1,7 milliardas francs ed in fond da gulivaziun cun 24 milliardas francs. Tenor Perlicz muntia quai in spretsch (Geringschätzung) envers il persunal ed ina comunicaziun nunsincera tar l'introducziun d'in nov sistem da paja.